

## 2 KOLIN

# Pol kivuu kipihac wê vông yuu ge la vô tibii Kolin

**1** <sup>1</sup>A Pol wê Anutu vînoo a nêb a tu sinale wê Yesu Kilisi vông ge. A hixôn il lig Timoti, xii kivuu kipihac tiga i loc vô Anutu nue xam wê xam dô vac vîgwe Kolin ge, hixôn xam wê xam dô vac vîgwe levac Glik vîhati ge. <sup>2</sup>Il mag Anutu yuu Apumtau Yesu Kilisi i vông vîzid hixôn kiyang malehe i loc dô hixôn xam.

### Pol pimil Anutu ên wê ngidu i xôn vac vîyin ge

<sup>3</sup>Il ob hi vixad i pec ên Anutu wê il lig Apumtau Yesu Kilisi ma ge, ên Anutu ge wê xo vîgwe pisiv ên xomxo vîhati, di ici va wê ob vông xomxo nilô vô vîyin maên. <sup>4</sup>Om vîyin vîhati wê tulec xe ge, Anutu vông xe nilôm vô vîyin maên, ên nêb xomxo ya obêc tulec vîyin ya ge od xe tiyi wê xe ob vông he nilô vô vîyin maên ge, tiyi xocbê Anutu vông xe nilôm vô vîyin maên ge. <sup>5</sup>Vîyin yuu myavinê wê Yesu kilê ilage val vô xe gwêbaga hixôn, lêc Yesu ngidu xe xôn di vông xe nilôm vô vîyin maên. <sup>6</sup>Om xe obêc kilê vîyin ya ge od kehe bêga nêbê xe nêb xam nilôm i vô vîyin maên di Anutu i vô xam vêl ên nipaên. Anutu obêc vông xe nilôm vô vîyin maên ge od ob vông xam êno nilôm vô vîyin maên, om buc wê xam ob tulec vîyin tiyi xocbê xe tulec ge od xam le xêkizêc di kilê vîyin vîhati hixôn nilôm nivîha. <sup>7</sup>Xe xovô ên xe nêbê xam obêc le xêkizêc vac vîyin. Ên xam kilê vîyin hixôn xe, om xe xovô ên xe nêbê Anutu ob vông xam nilôm i vô vîyin maên tiyi xocbê vông xe nilôm vô vîyin maên ge.

<sup>8</sup>Xam lige, xe nêb xe ob nêl vîyin wê xe kilê vac vîgwe levac Esia ge kitong vô xam, ên xam xovô. Ên vîyin tige levac mabu yocên luu xe vêl om vông xe xovô bêga ên xe nêbê xe obêc xib. <sup>9</sup>Om xe xo vîyin vac nilôm

bêga ên xe nêbê xe tiyi xocbê xomxo wê tibii tung buc pyap ên nêb ob hi xe xib ge. Lêc viyin levac tige val vô xe ên nêb xe o vông nilôm i loc vô xêkizêc wê xecxe va vông ge lêm. Nge, xe nilôm i loc vô Anutu tixed, ên xêkizêc wê Anutu vông ge ob tipi vô xomxo yibên kidi lec maviha ge. <sup>10</sup>Viyin tige levac mabu tiyi wê ob hi xe xib ge, lêc Anutu vô xe vêl ên viyin tyo, di obêc vô xe vêl ên viyin wê obêc tulec xe timuên ge hixôn. Om xe vông i vin xêkizêc ên xe nêbê viyin vihati wê ob tulec xe ge, Anutu ob vô vêl ên xe di vông xe dô nivihia. <sup>11</sup>Om xam ngidu xe xôn ya kitaaên, ên Anutu i ngô kitaaên wê xam tibeac vông ge di ngidu xe xôn, êdêc xomxo tibeac i yê di hi vixa i pec ên Anutu.

### Pol o kityoo he Kolin lêm

<sup>12</sup>Xe hi vixam pec ên môp wê xe mi vông ge, ên Anutu vông yuac vac xe nilôm om xe vông môp bôbac hixôn nilôm nivihia. Di xe o vông ya xovôên kibun ga lêm. Nge, vizid wê Anutu vông ge ngidu xe xôn di xe vông yuac ya. Om xe nilôm xovô bêga ên xe nêbê xe vông môp tibêge vac xomxo viyang viyang mahigun, di buc wê xe dô hixôn xam ge, od xe vông môp nivihia tibêgee luu vêl. <sup>13-14</sup>Di kipihac vihati wê a kivuu vô xam ge, a o yax kiyang ti vun ên xam lêm. Nge, a kivuu kiyang vihati yêp seac tiyi wê xam ob kitong di xovô kehe ge. Xam xovô kiyang ya pyap, lêc tibeac xam gên o xovô lêm, om a xovô ên a nêbê xam xovô kiyang i loc tiyi vihati, êdêc buc wê Apumtau Yesu ob vena ge od xam hi vixam i pec ên xe i tiyi xocbê xe hi vixam pec ên xam ge.

<sup>15</sup>Ilage a xovô ên a nêbê xam wê yuac wê a vông ge nivihia, om a nêb a ob lôc vô xam tax, ên vông xam xêmyaa i vô nivihia lu yuu. <sup>16</sup>A nêb a ob milôc vô xam tax, nang dêc la Masedonia, pyap dêc vena vô xam i tii vac, ên xam ngidu a xôn vac môp di a la Judia. <sup>17</sup>A nêb a ob la lê, lêc a laên ma, om xam xo bêna? Kiyang wê a nêl vô xam ge, mêd a nêl hixôn nilôg yuu yuu, me? Ge o bêge lêm. Ên môp wê a nêb a ob vông ge, a o nêl kiyang tiyi xocbê tibii ya mi nêl ge lêm. Ên vya wê lee yuu ên nêb ob vông ge, di ngwe wê nêbê obêc ma ge, he nêl yuu xôn vaxvax. Lêc a o vông bêge lêm. <sup>18</sup>Anutu ge wê kiyang nôn kehe om a nêl hixôn nôn bêga bê kiyang wê xe mi nêl vô xam ge, xe o lee yuu ên xe nêb “Xe ob vông”, me nêl ngwe nêb “ob ma”, xe o nêl yuu xôn vaxvax lêm. <sup>19</sup>Ên xen Sailas yuu Timoti, xen nêl Yesu Kilisi wê Anutu nu ge kitong vô xam, di xam xovô ên xam nêbê Kilisi ob nêl kiyang yuu vaxvax lêm. Nge, nêl kiyang nôn tixed. <sup>20</sup>Ên kiyang wê Anutu hilu ge Yesu vông vihati vô nôn lec, om il xovô kiyang wê Yesu vông ge di il lee yuu ên il nêb kiyang nôn, om il pimil Anutu lê vô levac. <sup>21</sup>Anutu vaci vông xêkizêc vô xe hixôn xam om il xôn le xêkizêc hixôn Kilisi, di ici va vinoo il ên nêb il vông i yuac, <sup>22</sup>di vông Myakilôhô Ngibua lam dô vac il nilôd tiyi xocbê il dô vac xenac tibit wê byêxên dop kisuu il lec ge, ên nêb il tu i nue pyap. Anutu vông

Myakilôhô Ngibua tiyi xocbê vông vizid taxlee, ên nêb il xovô bê obêc vông vizid vihati vô il timuên.

### Pol nêl kiyang wê o la Kolin lêm ge kehe kitong

<sup>23</sup>Anutu xovô a nilôg pyap om a obêc kityoo kiyang ge od i nêl a nêg nipaên i yêp seac di vông myaviwen vô a. Lêc a o kityoo lêm. Nge, a nêl kiyang hixôn nôn ên a nêbê a o lôc vô xam lutibed lêm, ên a nêb a ob lôc nêl kiyang xêkizêc vô xam di vông xam nilôm i vô viyin lêm. <sup>24</sup>Xe o tiyi wê xe ob kidu xam lec môp vông vinên ge lêm, ên xam le xêkizêc vac vông vinên pyap, om xe nêb xe ob ngidu xam xôn, ên xam dô hixôn xêmyaa nivaha.

**2** <sup>1</sup>A xo vac nilôg ên a nêbê a ob milôc vô xam ên vông xam nilôm i vô viyin i tii vac lêm. <sup>2</sup>Ên a obêc vông xam nilôm vô viyin ge od letya ob vông a xêgyaa vô nivaha? Ên xam obêc dô hixôn nilôm viyin ge od o tiyi wê xam ob vông a xêgyaa vô nivaha ge lêm. <sup>3</sup>A xo bêge, om a kivuu kipihac ti mi vông i loc vô xam ila, ên a nêb xam lêc pilepac xam, ên buc wê a obêc miloc vô xam ge od xam o lêc vông a nilôg i vô viyin lêm. Ên xam ge wê xam ob vông a xêgyaa vô nivaha, om a xovô ên a nêbê a obêc dô hixôn xêgyaa nivaha ge od ob vông xam xêmyaa vô nivaha hixôn. <sup>4</sup>Lêc buc wê a kivuu kipihac tige vô xam ilage od a kivuu hixôn nilôg viyin levac di a byag hixôn. A o kivuu kipihac tige ên a nêb a ob vông xam nilôm i vô viyin lêm. Nge, a nêb a ob vông xovôên vô xam bê a xêgyaa vin lec xam luu vêl.

### Xam kitya lim ti wê vông nipaên ilage nêl nipaên vêl

<sup>5</sup>Xam lim ti wê vông môp nipaên ilage, môp wê i vông ge o vông a tibed nilôg vô viyin lêm. Nge, vông xam vihati nilôm vô viyin hixôn. Lêc a nêb a ob vông xomxo tige ni i yoc lêm om a ob nêl kiyang tibeac lec i lêm. <sup>6</sup>Ên xomxo tige kô myaviwen vô xam tibeac lec nipaên wê i vông ge, om ge pyap. <sup>7</sup>Om gwêbaga xam xêmyaa i vin lec i di xam kitya nipaên wê i vông ge vêl di nêl kiyang malehe vô i, ên obêc dô hixôn nilô viyin levac ge od obêc vông i vô nipaên. <sup>8</sup>Mêgem a nêl vô xam bê xam vông môp nivaha vô i, ên i xovô bê xam xêmyaa vin lec i.

<sup>9</sup>Kipihac wê a kivuu vô xam ilage, a kivuu ên a nêb a ob yaxên xam béc xam obêc vô ninyam lehe vô kiyang wê a nêl ge vihati, me? <sup>10</sup>Xam obêc kitya xomxo ti nêl nipaên vêl ge od a êno ob kitya nipaên tige vêl. Nipaên ti obêc yêp di a obêc kitya vêl ge od a le vô Kîlisi manôn di kitya vêl ên a nêb i vô nivaha vô xam. <sup>11</sup>Ên il kityaên nipaên tige vêlên obêc ma ge od Seten ob kityoo il di vông il la vac môp nipaên, ên piyôp wê Seten vông ge il xovô pyap.

### Pol nilô vô viyin ên he Kolin

<sup>12</sup>Ilage wê a la vigwe Tloas ge od Apumtau tax vuayen ên a tiyi wê a ob nêl Kîlisi xolac kitong vô he lê, <sup>13</sup>lêc a nilôg vô viyin, ên a lig Taitas

o val nêl xam kiyang kitong vô a lêm, om a sea he Tloas di la vigwe Masedonia di la bin Taitas.

<sup>14</sup>Lêc gwêbaga a hi vixag pec ên Anutu, ên wê Kilisi vông vevac vô nipaên mi nginoo, om didi xe la vac niviha hixôn i, di vông xe la nêl Kilisi kitong vac vigwe vihati ên nêb xomxo vihati i xovô, tiyi xocbê susu nivivea niviha la vac vigwe vihati mi xomxo yaxên ge. <sup>15</sup>Ên Anutu yê xe tiyi xocbê susu nivivea wê Kilisi vông ge, om nivivea tige la vac xomxo mahigun, he wê Anutu ob vô he vêl ge di he wê ob yib mi la vac nipaên ge. <sup>16</sup>Lêc he wê ob yib mi la vac nipaên ge ob yaxên nivivea tige tiyi xocbê nivivea nuhu wê ob nux he yib ge, di he wê Anutu ob vô he vêl ge ob yaxên nivivea tige tiyi xocbê nivivea niviha wê ob vông he dô maviha ge. Om letya tiyi wê ob vông yuac tige? <sup>17</sup>Xomxo tibeac nêl xolac tiyi xocbê yuac bisnis wê he ob kô mone lec ge, lêc xe o vông môp tibêge lêm. Nge, xe nêl xolac ya nilôm tibed di xe o nêl kiyang kityooên ya hixôn lêm. Ên xe tu Kilisi nue om xe le vô Anutu manôn di nêl xolac wê Anutu vông vô xe ên nêb xe nêl vô xomxo vihati ge.

### **Xomxo Kolin tiyi xocbê kipihac wê ob nêl Pol he sinale yuac kitong ge**

**3** <sup>1</sup>Kiyang wê a kivuu ga, ga xe kô xe lec vô xam, me? Ma vêl. Di môp wê xomxo ya mi vông ge, wê he kô kipihac wê xomxo kivuu mi pimil he vac ge, xam nêb xe kô kipihac tibêge vô xomxo ya mi lam hilung vô xam, me? Di xam nêb xe kô kipihac tibêge vô xam ên i nêl xe kitong vô xomxo ya, me? <sup>2</sup>Xacxam va tiyi xocbê xe kipihac wê ob nêl xe kitong vô xomxo ge. Anutu kivuu kiyang tige yêp vac xe nilôm, om xomxo vihati xovô kipihac tige di kitong. <sup>3</sup>Ên xam le seac tiyi xocbê kipihac wê Kilisi kivuu di vông vô xe ên nêb xe viac ge. Lêc o kivuu ya kilipi lêm. Nge, kivuu ya Myakilôhô Ngibua wê Anutu maviha vông ge. Di o kivuu lec ngidax pitehe ti lêm. Nge, kivuu vac xomxo nilô.

<sup>4</sup>Xe nêl kiyang bêge, ên Kilisi ngidu xe xôn di xe vông i vin Anutu om xe nêl. <sup>5</sup>Xe o tiyi wê xe ob nêl bê xecxe va vông yuac ti ge lêm. Nge, Anutu ngidu xe xôn om xe vông yuac. <sup>6</sup>Ên Anutu vaci vông xêkizêc vô xe tiyi wê xe ob nêl kiyang paha wê hilu vô il ge kitong vô xomxo. Kiyang paha tige o tiyi xocbê Moses xolac wê yêp vac kipihac ge lêm. Nge, ge kiyang wê Myakilôhô Ngibua vông ge. Ên Moses xolac ge nêl xomxo nêl nipaên yêp seac om tiyi xocbê hi he yib, lêc Myakilôhô Ngibua môci vông il dô madviha.

### **Kiyang paha wê Anutu hilu ge nginoo Moses xolac tikwê vêl**

<sup>7</sup>Xolac wê Anutu kivuu lec ngidax di vông vô Moses ge, Anutu vông i lam hixôn xêseac, om xêseac tige linac lec Moses manôn di byêx lie Islel manôn om he o tiyi wê ob yê i manôn ge lêm, nang dêc xêseac tyo la vêl. Xolac wê Anutu vông vô Moses ge vông xovôên vô xomxo bêga nêbê he

ob yib lec nê nipaên, lêc xolac tige lam hixôn xêseac. <sup>8</sup>Om il ob xovô bêga bê kiyang paha wê Myakilôhô Ngibua vông ge, xêseac wê i vông ge levac luu xolac tikwê wê Moses vông ge vêl. <sup>9</sup>Ên xolac tikwê nêl ên nêbê xomxo nê nipaên yêp om he ob kô myaviwen lec, lêc xolac tige lam hixôn xêseac. Di xolac paha wê nêl ên nêbê Anutu yê xomxo nivihalec lec yuac wê Kilisi vông ge, val hixôn xêseac levac luu vêl. <sup>10</sup>Om xêseac wê val hixôn xolac tikwê ge tip la, ên xêseac wê val timuên ge luu xêseac ngwe wê lam tax ge vêl. <sup>11</sup>Ên xolac tikwê wê tip la ge lam hixôn xêseac lê, lêc xolac paha wê ob yêp luta ge, xêseac luu vêl.

<sup>12</sup>Xe vông i vin di dô bin buc wê kiyang tige vihati ob vô nôn lec ge. Om xe nêl kiyang vihati yêp seac vô xam, <sup>13</sup>di xe o vông xocbê Moses vông ilage lêm. Ên ilage Moses manôn xêseac ta lêc vun xôn ya nivimihi ên nêb Islele i o yê wê xêseac ob tip la ge lêm. <sup>14</sup>He Islele ge, piyôp xêkizêc. Vac ilage di i val tyip lec gwêbaga hixôn, om he obêc kitong xolac tikwê ge od tiyi xocbê nivimihi tige vun he manôn xôn om o tiyi wê he ob xovô kiyang tige kehe lêm. Ên Kilisi tibed ge wê ob kwax nivimihi tige vêl. <sup>15</sup>Vixôhilôg, buc vihati di i val vô gwêbaga, he obêc kitong Moses xolac ge od tiyi xocbê nivimihi yux vac he piyôp xôn. <sup>16</sup>Lêc xomxo ti obêc pilepac i mi lax vô Apumtau ge od Apumtau ob kwax nivimihi tige vêl ên i piyôp. <sup>17</sup>Apumtau ge Myakilôhô Ngibua om Myakilôhô Ngibua wê Apumtau vông ge obêc dô vac xomxo ti nilô ge od ob piwelac kiyang yuu môp wê ku i xôn ge vêl di i dô vac nivihalec. <sup>18</sup>Om il vihati ga, susu ti o vun il madnôn xôn lêm, om xêseac wê Apumtau vông ge linac lec il tiyi xocbê deac wê hixelac di linac lec xomxo vihati ge. Xêseac linac lec il tiyi buc vihati om Myakilôhô Ngibua wê Apumtau vông ge vông yuac vac il nilôd di pilepac il lax tiyi xocbê Apumtau vaci ge.

#### Pol he sinale vông yuac di tulec viyin hixôn

**4** <sup>1</sup>Anutu xo vigwe pisiv ên xe di vông yuac sinale tige vô xe, om xe nim o ma lec yuac tige lêm. <sup>2</sup>Nge, xe vô nimim vô môp xôpacên wê nipaên ge, di xe o kityoo xomxo ya kiyang lêm, di xe o kô kiyang baba ya mi lôm juda vac Anutu xolac hixôn lêm. Nge, xe nêl kiyang nôn kitong vô xomxo, ên xe nêb he i ngô di xovô bê yuac wê xe vông vô Anutu manôn ge, xe vông nivihalec. <sup>3</sup>Xolac wê xe nêl ge, kehe obêc yêp xôpacên vô xomxo ya ge, od yêp xôpacên vô he wê obêc yib mi la vac nipaên ge. <sup>4</sup>Xomxo tigege o vông i vin lêm, ên Seten wê mi kityoo xomxo kibun ga ge le vac he piyôp xôn mi i vô mapitoc, om o tiyi wê xêseac wê xolac vông ge ob linac vac he nilô ge lêm. Xolac tige nêl xêseac wê Kilisi vông ge kitong, ên Kilisi tiyi xocbê Anutu vaci. <sup>5</sup>Kiyang wê xe nêl ge, xe o yong xe lêm. Nge, xe nêl Yesu kitong bêga ên xe nêbê Yesu Kilisi ge Apumtau. Di xe ga, xe tu xam nume yuac lec Yesu lê. <sup>6</sup>Lec buc taxlee ilage Anutu nêl ên nêbê, “Xêseac i linac vac mapitoc.” Di gwêbaga Anutu vông xêseac wê i vông ge

lam linac vac il nilôd, om il xovô xêseac wê Anutu vông ge wê linac lec Kîlisi manôn.

<sup>7</sup>Xêseac tige tiyi xocbê vizid nivîha yang, lêc Anutu tung i la vac xê nilôm tiyi xocbê tung vac dêg wê o xêkizêc lêm ge nilô, ên nêb xomxo i yê di xovô bê xêkizêc levac tige o yêp vô xe lêm. Nge, lam vô Anutu tîbed. <sup>8</sup>Viyin viyang viyang ge vihati tulec xe tiyi buc tîbeac, lêc o pwooc xe pec lêm. Viyin tige vông xe piyôp vô judajuda di xe xo kiyang tîbeac lê, lêc o vông xe piyôp vô nîpaên lêm. <sup>9</sup>Di xomxo tîbeac tii xe nêb ob vông myavinê vô xe, lêc Anutu o sea xe lêm. Di he hi xe lê, lêc he o hi xe vinux lêm. <sup>10</sup>Xe kilê yibên wê Yesu vông ge lec nimnivi tiyi buc vihati, ên maviha wê Yesu vông ge i lam yêp seac di ngidu xe nimnivi xôn. <sup>11</sup>Xomxo vông myavinê vô xe tiyi buc vihati ên nêb ob hi xe xib ên wê xe nêl Yesu xolac ge, lêc môp yêp bêga, ên nêb xomxo i yê xe nimnivi mayib yib di xovô bê maviha wê Yesu vông ge ngidu xe nimnivi xôn. <sup>12</sup>Om xe dô tiyi xocbê xe ob xib ge, lêc môp tige ngidu xam xôn di vông xam dô mamviha.

<sup>13</sup>Xe timu vô môp vông vinên tiyi xocbê kiyang wê yêp vac kipihac xolac bêga ên nêbê, “A vông i vin Anutu om a nêl i kiyang kitong.” Xe êno vông i vin om xe nêl Anutu kiyang kitong yêp seac, <sup>14</sup>ên xe xovô ên xe nêbê Anutu tipî vô Apumtau Yesu kidi lec vac yibên om obêc tipî vô xe êno kidi lec vac yibên tiyi xocbê Yesu ge, di ob vông xe hixôn xam, il xôn la le vô Anutu manôn. <sup>15</sup>Viyin vihati wê xe kilê ge ob vô nôn nivîha vô xam, êdêc vizid wê Anutu vông ge i loc vô xomxo tîbeac di he i hi vîxa i pec ên Anutu di yong i lê i vô levac.

### Viyin kibun ga ob vô nôn nivîha timuên

<sup>16</sup>Xe xovô kiyang tige, om xe nim o ma lec yuac wê xe vông ge lêm. Vixôhîlôg, xe kilê viyin tîbeac om vông xe nimnivi vô xêlehe sea, lêc xe nilôm mô, Anutu ngidu xôn di vông i vô paha lec tiyi buc vihati. <sup>17</sup>Viyin tige obêc vô nôn nivîha vô xe timuên bêga bê xe ob la dô vac xêseac nilô luta lêc luta. Xêseac tige levac mabu luu viyin kibun ga vêl. Om viyin wê tulec xe ge, xe xê tiyi xocbê susu pileva wê ob yêp dia lêm ge. <sup>18</sup>Om xe mamnôn o la vô susu wê il xê ya madnôn ge lêm. Nge, xe mamnôn la vô susu wê il madnôn yêên ma ge. Ên susu wê il madnôn yê ge ob dô myabo tya di xôa ob ma. Dom susu wê il madnôn yêên ma ge ob yêp luta lêc luta.

### Pol nilô vô nivîha ên wê ob la dô hixôn Kîlisi gê lag puunê ge

**5** <sup>1</sup>Xe xovô ên xe nêbê xe nimnivi kibun ga tiyi xocbê xumac wê ob yêp myabo tya di pital mi tô sea ge, om xumac tige obêc dii sea ge od xumac ngwe yêp lag puunê wê Anutu ob vông vô xe ge. Xumac tige, xomxo o lox ya vigê lêm. Nge, Anutu vaci lox om ob yêp luta lêc luta.

<sup>2</sup>Lêc gwêbaga xe dô hixôn nimnivi kibun ga, om xe dô hixôn viyin di vô zidzid, ên xe nêb xe ob dô vac xe xumac lag puunê tiyi xocbê xe vinyum ngakwi lec nimnivi xôn ge. <sup>3</sup>Ên xe obêc vinyum lec ge od xe ob dô nimnivi pileva lêm. <sup>4</sup>Lêc gwêbaga xe gên dô hixôn nimnivi kibun ga tiyi xocbê xe dô vac xumac wê ob dii sea ge, om xe nilôm vô viyin di xe dô hixôn nilôm byagên. Lêc xe o nêl ên xe nêbê xe ob sea nimnivi kibun ga di dô ya kinum pileva lêm. Nge, xe nêb xe ob vinyum nimnivi lag puunê lec, ên ninivi maviha tige i vông ninivi mayibên i vixôl vêl. <sup>5</sup>Anutu vaci viac xe ên nêb xe la dô mamviha timuên, di vông Myakilôhò Ngibua lam vô xe ên nêb xe xovô bê kiyang tige vihati ob vô nôn lec vô xe.

<sup>6</sup>Om xe dô hixôn nilôm nivihia tiyi buc vihati, di xe xovô ên xe nêbê xe nimnivi kibun ga tiyi xocbê xe bom wê xe dô vac ge om xe gên dô teva ên Apumtau ben. <sup>7</sup>Gwêbaga xe o xê Apumtau manôn lêm, lêcom xe vông i vin i kiyang di dô vac môp vông vinên. <sup>8</sup>Om xe dô hixôn nilôm nivihia, di xe xêmyaa vin lec ên xe nêb xe ob sea nimnivi kibun ga di la dô nivihia hixôn Apumtau vac i ben. <sup>9</sup>Lêcom xe obêc dô hixôn Apumtau vac i ben, me xe ob gên dô teva ge od xe xêmyaa vin lec ên xe nêb xe ob vông môp wê Apumtau ob yê nivihia ge. <sup>10</sup>Ên obêc buc timuên ge od il vihati ob la le vô Kilisi manôn di i yaxên môp wê il vông vô buc wê il dô hixôn nidnivi kibun ga ge di il toto obêc kô myaviwen tiyi nivihia yuu nipaên wê il vông ge.

### Pol nêl he sinale yuac kitong

<sup>11</sup>Xe xona ên Apumtau om xe vông yuac ên xe nêb xomxo i vô ninya lehe vô xolac di vông i vin. Môp wê xe vông ge vihati yêp seac vô Anutu mi i xovô pyap, di a xo ên a nêbê xam êno xovô xe hixôn. <sup>12</sup>Xe o nêl kiyang tibêge ên xe nêb xe ob yong xe vô xam lêm. Nge, xe nêl ên xe nêb xaxam mô xovô di hi vixam i pec ên xe, ên obêc bêge ge od xam obêc tiyi wê xam ob nêl kiyang lax vô xomxo wê so vya vô xe di kô he lec ên môp wê he vông ge, lêc kiyang nôn o yêp vac he nilô lêm. <sup>13</sup>Xomxo ya obêc nêb xe vông yuac tiyi xocbê piyôp yacyac ge od pyap, ên xe vông ên xe nêbê Anutu lê i vô levac. Di xe obêc vông ya piyôp nivihia ge od xe vông ên xe nêb i vô nivihia vô xam. <sup>14</sup>Ên Kilisi xêyaa vin lec xe, om xêyaa vin lecên tige kidu xe di xe vông yuac, ên xe xovô ên xe nêbê xomxo tived yib ên il vihati, om tiyi xocbê il vihati xib hixôn. <sup>15</sup>Yesu yib ên xomxo vihati, ên nêb il wê il dô madviha ge, il o lêc xovô icil va lêm. Nge, nêb il xovô xomxo ti wê yib di kidi lec maviha ên il ge di vông yuac wê ob vông i lê vô levac ge.

<sup>16</sup>Om xe ob tixuu xomxo lec môp wê xomxo vông ge lêm. Vixôhilôg, ilage xe tixuu Kilisi lec môp wê xomxo vông ge, lêc gwêbaga xe xovô i om xe ob vông môp tibêge i tii vac lêm. <sup>17</sup>Xomxo ti obêc vông i vin di tu Kilisi xe ge od Anutu obêc vông xomxo tige nilô vô paha lec. Xam ngô lê. Môp tikwê tip la, di môp paha val gwêbaga.



<sup>18</sup>Anutu vaci tu môp tige vihati kehe, om ici va vông Kĩlisi lam hi kiyang wê yêp vac il Anutu mahigun ge yib di kituc il lam dô nôn tixed hixôn Anutu, di vông kiyang malehe vac xe vigêm ên nêb xe la nêl kitong vô xomxo ên he i dô vac kiyang malehe nilô. <sup>19</sup>Kiyang malehe tige bêga nêbê Anutu vông Kĩlisi lam ên nêb ob hi kiyang wê yêp vac il Anutu mahigun ge i yib. Om Anutu o hôm nipaên wê il vông ge xôn lêm. Nge, kitya vihati vêl. Di vông yuac vac xe vigêm ên nêb xe nêl kiyang malehe kitong vô xomxo. <sup>20</sup>Om xe tu Kĩlisi manôn di nêl i kiyang, om tiyi xocbê Anutu vaci nêl kiyang vô xomxo vac xe myam, om xe nêl kiyang lec Kĩlisi lê bêga ên xe nêbê “Xam loc kwabo vô Anutu ên i vô malehe vô xam.” <sup>21</sup>Kĩlisi o vông môp nipaên ti lêm, lêcom Anutu kituc il nêd nipaên vihati la lec Kĩlisi di i yib ên il. Anutu vông bêge ên nêb ob yê il nivihha lec yuac wê Kĩlisi vông ge.

### Sinale kilê viyin lec yuac wê he vông ge

**6** <sup>1</sup>Xe wê xe vông yuac hixôn Anutu, om xe ob nêl kiyang vô xam bêga bê Anutu xo vigwe pisiv ên xam di vông vizid nivihha vô xam, om le i léc sea vizid tige i loc yêp lêm. <sup>2</sup>Ên Anutu kiyang yêp vac kipihac xolac bêga ên nêbê,

“Vô buc nivihha wê a xo vigwe pisiv ên xam ge, om a vô ninyag vô xam vyam, di buc wê a nêb a ob vô xam vêl ge om a ngidu xam xôn.”

Anutu nêl bêge, om xam wê lê. Gwêbaga buc nivihha tyo mê. Di buc wê Anutu ob vô il vêl ge, val gwêbaga.

<sup>3</sup>Xe nêb xomxo ti i o léc nêl kiyang nipaên lec yuac wê xe vông ge lêm, om xe o vông môp wê xomxo ob yê tiyiên ma ge lêm. <sup>4</sup>Nge, môp vihati wê xe vông ge xe vông ên xe nêb i nêl xe kitong bê xe ga Anutu nue yuac, om buc wê xe tulec viyin ya, me susu ma ên xe, me xomxo vông viyin ya vô xe ge od xe le xêkizêc di kilê viyin tige vihati. <sup>5</sup>Xomxo hi xe di vông xe la dô vac kalabuhu, di xomxo tii xe ên

nêb ob hi xe vô nipaên, di xe vông yuac levac, di xe o xêp nivihha ti lêm di xe dô vip. <sup>6</sup>Lêc xe nilôm xêseac, di xe dô hixôn xovôen nivihha, di xe o kunac xomxo lutixed lêm, di xe vông môp nivihha vô xomxo vihati, di Myakilôhò Ngibua vông xêkizêc vô xe di xe xêmuya vin lec xomxo nôn yang. <sup>7</sup>Xe nêl kiyang nôn di vông yuac ya xêkizêc wê Anutu vông ge, di môp nivihha wê xe vông ge tiyi xocbê susu vevac wê xe hôm vac vigêm vilu vilu di vông vevac ya ge. <sup>8</sup>Xomxo mangwe yê xe nivihha di kô xe lec, di mangwe yê xe nipaên. Di xomxo ya nêl kiyang nimi lec xe di ya pimil xe vô xomxo ya. Xomxo ya nêl ên nêbê xe tibii kityooên, léc kiyang wê xe mi nêl ge nôn. <sup>9</sup>Xomxo ya lungên xe, léc xomxo tibeac xovô xe pyap. Xe dô tiyi xocbê xe xib ge lê, léc xe gên dô mamvihha. Anutu vông myavinê vô xe nêb ob titô xe, léc o hi xe xib lêm. <sup>10</sup>Xe nilôm vô viyin lê, léc xe



xêmyaa vô niviha tiyi buc vihati. Di xe dô tiyi xocbê xomxo wê nêl susu maên ge, lêc xe vông vizid tibeac vô xomxo tibeac. Xe nêl susu ma, lêc susu vihati tu xe xe.

<sup>11</sup>Xam Kolin, kiyang wê yêp vac xe nilôm ge, xe nêl vihati yêp seac vô xam, di xe vông nilôm loc diluhu vô xam. <sup>12</sup>Xe o kol xe ên xam lêm. Nge, xe xêmyaa vin lec xam. Lêc xam ge, xam kol xam ên xe. <sup>13</sup>Om a nêl vô xam tiyi xocbê ma nêl vô nue ge, bêga bê xam tax vuayen ên nilôm di vông i loc yadiluhu vô xe.

### Il tiyi xocbê Anutu xumac ngibua

<sup>14</sup>Xomxo wê o vông i vin Kilisi lêm ge, xam o lêc kituc lec he mi vông yuac i yêp tived lêm. Ên niviha yuu nipaên, yuu o tiyi wê yuu xêyaa ob vin lecma ge lêm. Di xêseac o tiyi wê ob yêp hixôn mapitoc ge lêm. <sup>15</sup>Xam xovô lê. Kilisi yuu Seten, yuu xôn ob vông yuac tiyima, me? Di xomxo wê vông i vin Yesu ge hixôn xomxo wê vông vinên maên ge, yuu xôn ob dô ya xovôên tived, me? Ma vêl. <sup>16</sup>Anutu xumac ngibua hixôn xumac wê anutu kityooên vông ge, yuu xôn tiyima, me? Xam xovô bê il tu xumac ngibua wê Anutu mavuha vông ge, tiyi xocbê kiyang wê Anutu nêl mi i yêp bêga ên nêbê,

“A ob dô vac he mahigun di tup vac he, di a ob tu he Anutu, di he ob tu a nuge.”

<sup>17</sup>Mêgem Anutu nêl hixôn bêga ên nêbê,

“Xam sea he di loc dô viyonên, di le i lêc hôm susu ningeac hixôn lêm, ên aca va ob kô xam di viac xam nivuha. <sup>18</sup>A ob tu xam mam, di xam ob tu a nuge vêx yuu vux. Apumtau xêkizêc kehe nêl kiyang tiga.”

**7** <sup>1</sup>Xam lige wê a xêgyaa vin lec xam ge, Anutu hilu kiyang tige vô il, om môp ningeac wê ob vông il nidnivi yuu nilôd vô nipaên ge, il ob sea vihati i yêp xel, di vông nilôd i vô paha lec. Om il ob xona ên Anutu di tup vô môp bôbac tived êdêc tu xomxo nivuha nôl.

### He Kolin pilepac he om vông Pol nilô vô nivuha

<sup>2</sup>A nêl vô xam bê xam xêmyaa i vin lec xe, ên xe o vông soên ti vô xomxo ti lêm, di xe o vông xomxo ti vô nipaên lêm, di xe o kityoo xomxo ti di vô i susu vêl lêm. <sup>3</sup>A o nêl kiyang tiga ên a nêb a ob titô xam lêm. Ên a nêl pyap gwêba ên a nêbê xe xêmyaa vin lec xam, om xe obêc dô mamviha hixôn xam, me xe obêc xib hixôn xam ge od pyap. <sup>4</sup>A nêl kiyang vihati yêp seac vô xam, di a hi vixag pec ên xam. A dô vac viyin levac, lêc xam vông a nilôg vô viyin maên om a dô hixôn xêgyaa nivuha yang.

<sup>5</sup>Buc wê xe val dô vîgwe levac Masedonia ge od xe kilê viyin tibeac di xe nimnivi o dô seac vêl lêm. Nge, viyin viyang viyang hivun xe xôn,

ên xomxo tibeac vông vevac vô xe, di xe nilôm xona. <sup>6</sup>Lêc Anutu ge wê ob vông xomxo wê nilô vô viyin ge, he nilô vô viyin maên, om vông xe nilôm vô viyin maên ên wê vông Taitas val vô xe ge. <sup>7</sup>Taitas val vô xe, om vông xe nilôm vô viyin maên, lêc o môt tige tibeac lêm. Nge, xam vông Taitas nilô vô viyin maên mi i val tixuu kiyang wê ngô vô xam ge vô xe, om kiyang tige vông xe nilôm vô viyin maên hixôn. Ên Taitas nêl ên nêbê xam nilôm kidu xam ên xam nêb xam ob wê a, di xam nilôm byag ên wê xam vông viyin vô a ge, di xam nilôm kidu xam ên xam nêb xam ob ngidu a xôn, om kiyang tige vông a xêgyaa vô nivihya yang.

<sup>8</sup>A xovô ên a nêbê kipihac wê a kivuu vô xam ilage vông xam nilôm vô viyin, lêc a nilôg o vô viyin ên kipihac tige lêm. Vixôhilôg, ilage a nilôg vô viyin ên wê kipihac tige vông xam nilôm vô viyin ge, lêc viyin tige o yêp vô xam xuhu dia lêm. Nge, yêp myabo tya di tiyôô. <sup>9</sup>Om gwêbaga a xêgyaa vô nivihya, lêc o vô nivihya ên wê a vông xam nilôm vô viyin ge lêm. Nge, vô nivihya ên wê viyin tige vông xam pilepac xam ge. Ên Anutu vaci vông xam nilôm vô viyin, om kiyang wê xe nêl ge ti o vông xam vô nipaên lêm. <sup>10</sup>Ên nilô viyin wê Anutu vông vô xomxo ge vông he pilepac he di Anutu vô he vêl ên nipaên di vông he dô vac vizid, om il nilôd ob vô viyin lec môt tibêge lêm. Lêc nilô viyin wê xomxo kibun ga vông ge ob vô nôn nivihya lêm. Nge, ob hi he yib. <sup>11</sup>Om xam wê lê. Anutu vông xam nilôm vô viyin, lêc viyin tige vô nôn nivihya tibeac vô xam bêga bê xam nilôm kidu xam ên xam nêb xam ob titô nêb kiyang, di xam xêmyaa vô myavinê vô môt nipaên di xam xona ên Anutu. Di xam nilôm kidu xam ên nêb xam ob wê a, di xam vông yuac xêkizêc ên xam nêb xam ob titô xomxo ti wê vông nipaên ge di vông myaviwen vô i. Môt tige vihati nêl xam kitong bêga ên nêbê xam titô kiyang tige pyap, om nipaên ti o yêp vô xam lêm.

<sup>12</sup>Om kipihac wê a kivuu vô xam ilage, a o kivuu vô xomxo ti wê vông môt nipaên ge lêm. Di a o kivuu vô xomxo ti wê xomxo tige vông i vô nipaên ge lêm. Nge, a kivuu vô xam vihati ên a nêb i vông xovôên vô xam vô Anutu manôn bêga bê xam xêmyaa vin lec xe nôn.

<sup>13</sup>Om môt wê xam vông ge vông xe nilôm vô viyin maên. Xe nilôm vô viyin maên di xe nilôm vô nivihya hixôn. Ên xe xovô wê xam vihati vông Taitas nilô vô viyin maên ge om vông xe nilôm vô nivihya hixôn. <sup>14</sup>Ên ilage a kô xam lêm lec vô Taitas manôn di xam o vông a nig yoc ên kiyang tige lêm, ên xam vông kiyang tige vihati vô nôn lec. Kiyang vihati wê a nêl vô xam ilage vixôhilôg nôn, di kiyang vihati wê a kô xam lêm lec vô Taitas manôn ge kiyang nôn vixôhilôg. <sup>15</sup>Buc wê Taitas loc vô xam ge od xam vihati kô i lec hixôn xonaên di nim yetacên di xam vô ninyam lehe vô kiyang wê i nêl ge, om gwêbaga Taitas xovô môt nivihya wê xam vông vô i ge di i xêyaa vin lec xam luu vêl. <sup>16</sup>Di a ga, a xovô ên a nêbê xam obêc dô vac môt nivihya tiyi buc vihati, om a xêgyaa vô nivihya ên xam.

Pol nêl kiyang lec mone wê ob ngidu xomxo Judia xôn ge

**8** <sup>1</sup>Xam lige, a ob nêl he konglegesen vac vigwe levac Masedonia ge kitong vô xam, ên xêyaa vin lecên wê Anutu vông ge vô nôn nivihã vac he mahigun. <sup>2</sup>Viyin levac tulec he tiyi buc vihati, léc he kilê viyin hixôn xêyaa nivihã. Dì he nêl susu ma, léc he vông nilô la vô môm wê ob ngidu xomxo wê susu ma ên he ge xôn. <sup>3</sup>A xovô môm wê he vông ge om a nêl bêga vô xam ên a nêbê heche va nêb he ob tung mone ya, om he tung mone tiyi xocbê wê dô vô he ge, léc he tung mone ya la luu vêl hixôn. <sup>4</sup>Dì he nêl xe xêkizêc ên he nêb xe kô mone wê he tung ge mi la hixôn mone wê konglegesen viyang viyang kituc ên nêb ob vông i loc ngidu Anutu nue wê dô Judia ge xôn. <sup>5</sup>Ilage xe xo ên xe nêbê he Masedonia ob vông mone ya, léc he vông xe yetac ên wê he o vông môm tige tibed lêm. Nge, taxlee he vông heche va la diluhu vô Apumtau di vông he la vac xe kwa ngibi tiyi môm wê Anutu nêl ge.

<sup>6</sup>Konglegesen Masedonia vông môm tibêge, om xe nêl vô Taitas ên xe nêb i loc vô xam, ên vông yuac nivihã wê loc nêl vô xam ilage i vô nôn lec. <sup>7</sup>Môm wê nivihã ge vihati vô levac vac xam mahigun, om xam vông i vin xêkizêc ta di nêl Yesu xolac, di xam xovô kiyang vihati, di xam vông nilôm la diluhu vô Anutu yuac di xam xêmyaa vin lec xe. Om a nêl vô xam bêga bê môm wê ob ngidu xomxo xôn ya mone ge i vô levac vac xam mahigun hixôn.

<sup>8</sup>A nêb a ob kidu xam lec môm tige lêm. Nge, a ob nêl he Masedonia môm kitong vô xam ên a nêbê he vông nilô la vô môm nivihã tige, om a nêb a ob yaxên bê xêyaa vin lecên wê xam vông ge obêc vô nôn nivihã tibêge, me? <sup>9</sup>Xam xovô vizid wê il lig Apumtau Yesu Kilisi vông ge pyap. Ên Yesu dô vac xêseac hixôn vizid vihati, léc nêb ob ngidu il xôn om lam tu xocbê xomxo wê nêl susu maên ge, ên nêb môm wê lam tu xocbê xomxo wê nêl susu maên ge i vông il tulec vizid tibeac.

<sup>10</sup>Om a ob nêl vô xam i tiyi xovôên wê aca va vông ge bêga bê xam vihati obêc tung mone pyap ge od obêc nivihã. Ên xam xovô yuac tige taxlee ên xam nêb xam ob vông, di klismas ngwe tax, xam vông mone mangwe. <sup>11</sup>Om a ob nêl vô xam bê gwêbaga xam kituc mone ya hixôn ên yuac tige i pyap. Ilage xam nilôm kidu xam ên nêb xam ob vông yuac tige, om gwêbaga xam nilôm i kidu xam di xam tung mone i tiyi xocbê wê dô vô xam ge, ên yuac tige i pyap. <sup>12</sup>Xomxo ti obêc nêb tung mone di obêc tung i tiyi xocbê wê dô vô i ge od Anutu ob yê nivihã. Xomxo ya ob vông levac di ya ob vông nipwo, léc Anutu ob yê vihati nivihã. Ên Anutu nêb xomxo toto i tung mone i tiyi xocbê wê dô vô he ge.

<sup>13</sup>A o nêl ên a nêb xam vông mone levac vô xomxo ên he i dô nivihã di xam dô nipaên lêm. Nge, a nêb xam vihati dô nimvihã i tiyima.

<sup>14</sup>Gwêbaga xam nêl susu tibeac dô, om xam vông ya i loc ngidu he wê

susu ma ên he ge xôn, êdêc susu obêc ma ên xam vô buc timuên di he vông tibeac obêc dô ge od he i vông ya vô xam ên i ngidu xam xôn. Ên obêc bêge ge od xam vihati ob dô tiyima. <sup>15</sup>Tiyi xocbê kiyang wê yêp vac xolac bêga ên nêbê, “Xomxo wê tulec yaên tibeac ge, yaên tiyi he di o luu vêl lêm, di he wê tulec nipwo tya ge o myag yaên ti lêm.”

### Taitas yon li yuu ob loc vô he Kolin

<sup>16</sup>A hi vixag pec ên wê Anutu vông Taitas xêyaa vin lec xam tiyi xocbê a xêgyaa vin lec xam ge. <sup>17</sup>Om kiyang wê a nêl vô Taitas ên a nêb i loc yê xam ge, Taitas tyuc lec, di ici va nilô kidu i hixôn ên nêb ob loc vô xam. <sup>18</sup>Di il lig vông vinên ti ob loc hixôn Taitas. Xomxo tige vông yuac xolac om xomxo vac konglegesen vihati xovô i di pimil i. <sup>19</sup>Lêc he o pimil i ya kiyang pileva lêm. Nge, konglegesen vihati vinoo i, ên nêb i loc hixôn xe di xe xôn kô mone mi la vông vô lige vông vinên Judia wê nêb susu maên ge. Yuac tige, xe vông ên xe nêb xe ob vông Apumtau lê i vô levac, om xe nêb xomxo i yê di xovô bê xe vông nilôm la vô yuac wê ob ngidu xomxo xôn ge.

<sup>20</sup>Mone mabu tige, xe nêb xomxo ti i o lêc so kiyang lec xe lec mone tige lêm, om xe ob vông xomxo tige i loc hixôn. <sup>21</sup>Ên xe nêb xe ob vông yuac nivîha vô Anutu vaci lêm. Nge, xe nêb xomxo i yê yuac wê xe ob vông ge nivîha hixôn.

<sup>22</sup>Om xe ob vông il lig ti i loc hixôn yuu. Xomxo tige, xe yaxên tiyi buc tibeac, lêc vông yuac viyang viyang ge xêkizêc, di gwêbaga xomxo tige nilô kidu i di vô nibu nibu nêb ob loc vô xam, ên xovô xam pyap ên nêb xam obêc vông yuac nivîha. <sup>23</sup>Taitas ge xam xovô pyap bê i wê xii xôn vông yuac lec xam ge. Di lig yuu ge, yuu tu konglegesen vihati manôn di vông yuac wê ob vông Kilisi lê vô levac ge. <sup>24</sup>Om xam xêmyaa i vin lec yon di xam viac yon i nivîha, ên konglegesen vihati i yê mi xovô bê kiyang wê xe pimil xam ge kiyang nôn.

### Môp wê ob ngidu Anutu nue xôn ge

**9** <sup>1</sup>Xam xovô pyap lec mone wê il ob vông i la ngidu Anutu nue Judia xôn ge, om a ob kivuu kiyang ti i tii vac vô xam lêm. <sup>2</sup>Ên a xovô pyap ên a nêbê xam nilôm kidu xam ên xam nêb xam ob vông yuac tige, om a pimil xam vô he Masedonia bêga ên a nêbê, “Xomxo vac vigwe levac Glik hilu kiyang pyap lec klismas ngwe tax ên he nêb he ob tung mone.” He Masedonia ngô kiyang tige di xovô wê xam nilôm kidu xam ên yuac tige om vông he tibeac xêyaa vin lec yuac tige ên he nêb he ob vông hixôn. <sup>3</sup>Om gwêbaga a nêb a ob vông lig yon i loc vô xam, om xam viac mone pyap i tiyi xocbê kiyang wê a nêl vô he Masedonia ge, ên kiyang wê a mi yong xam vô he ge, he i o lêc yê tiyi xocbê kiyang nôn maên lêm. <sup>4</sup>Ên he Masedonia ya obêc loc hixôn a timuên di xe obêc xê wê xam gên

o tung mone pyap lêm ge od obêc vông a nig yoc di vông xam nim yoc hixôn ên wê a yong xam pileva vô he ge. <sup>5</sup>A xo bêge, om a nêb lig yon i loc mug vô xam, ên viac mone wê xam nêl pyap ên xam nêb xam ob vông ge, êdêc buc wê xe obêc miloc vô xam ge od xe ob xê wê xam kituc mone pyap hixôn nilôm nivaha di xam o vông ên wê xomxo kidu xam nginong ge lêm.

<sup>6</sup>Xam xovô bêga bê xomxo ti obêc xin vê yuu ge od ob kô nôn yuutyabed. Di xomxo ti obêc xin vê tibeac ge od ob kô nôn tibeac luu vêl. <sup>7</sup>Om xam toto vông mone i tiyi xocbê xam nilôm xovô ên xam nêb xam ob vông ge. Di xam o lêc vông hixôn nilôm viyin lêm. Di le i lêc vông ên wê xomxo kidu xam ge lêm. Ên Anutu xêyaa vin lec xomxo wê tung mone hixôn nilô nivaha ge. <sup>8</sup>Anutu tiyi wê ob vông vizid vihati hivun xam xôn, om obêc vông susu wê ob ngidu xam xôn ge vô xam i tiyi buc vihati di obêc vông vô xam i luu vêl tiyi wê xam ob vông yuac nivaha ya ge. <sup>9</sup>Tiyi xocbê kiyang wê yêp vac xolac bêga ên nêbê,

“Xomxo ti wê titang i susu vô xomxo wê nêb susu maên ge, môt nivaha wê i vông ge ob vô nôn nivaha di ob yêp luta.”

<sup>10</sup>Anutu ge wê vông susu vê vô xomxo mi he la xin, di vông vê tige vô nôn tibeac mi xomxo ya, om Anutu obêc vông susu vê vô xam di vông i vô tibeac, di ob vông môt nivaha wê xam vông ge vô nôn tibeac. <sup>11</sup>Anutu obêc vông susu tibeac vô xam tiyi buc vihati, tiyi wê xam ob vông susu tibeac vô xomxo wê nêb susu maên ge. Om mone wê xam vông ge xe obêc kô mi la vông vô xomxo ge od ob vông he hi vixa pec ên Anutu. <sup>12</sup>Om yuac nivaha wê xam vông ge ob ngidu Anutu nue wê nêb susu maên ge xôn di ob vô nôn nivaha hixôn bêga bê ob vông he tibeac hi vixa pec ên Anutu. <sup>13</sup>Ên môt wê xam ngidu lime vông vinên xôn ge ob nêl xam kitong vô xomxo, om he ob xovô wê xam vông i vin Kilisi xolac di vông i vô nôn lec ge, di he ob yê wê xam vông mone levac vô he hixôn xomxo baba ge, om he ob pimil Anutu ên xam. <sup>14</sup>Di he ob xovô bê xêyaa vin lecên wê Anutu vông ge vô levac vô xam, om he xêyaa ob vin lec xam di he ob kitaa vô Anutu lec xam. <sup>15</sup>Il ob hi vixad i pec ên Anutu, ên wê vông vizid levac mabu ti vô il ge. Kiyang wê il nêl ge o tiyi wê ob nêl vizid tige kehe ge lêm, ên vizid tige nivaha yang luu vêl.

### Pol piwelac kiyang viyin vêl ên i

**10** <sup>1</sup>Xomxo ya nêl ên he nêbê buc wê a dô hixôn xam ge od a xona om a mi nêl kiyang malehe vô xam, lêc buc wê a dô teva ên xam ge od a kivuu kiyang xêkizêc vô xam. He nêl bêge, lêc a Pol, a nêb a ob nêl kiyang malehe vô xam tiyi xocbê Kilisi vông ge. <sup>2</sup>Om a ob kitaa xam bê xam viac xam nivaha, êdêc buc wê a obêc miloc vô xam ge od a ob nêl kiyang xêkizêc vô xam lêm. Lêc a nêb a ob nêl kiyang xêkizêc vô xomxo wê nêb xe mi timu vô môt kibun ga ge. <sup>3</sup>Vixôhilôg, xe dô kibun ga, lêc

vevac wê xe vông ge o tiyi xocbê vevac kibun ga lêm. <sup>4</sup>Ên xe vông vevac vô môt nipaên, léc xe o vông vevac ya susu kibun ga lêm. Nge, xe vông vevac ya xêkizêc wê Anutu vông ge tiyi wê xe ob dii xumac xêkizêc wê Seten vông ge vêl. <sup>5</sup>Om xovôên wê xomxo vaci vông ge, hixôn kiyang wê xomxo yong he di le vac môt xôn ên xomxo wê nêb ob xovô Anutu ge, xe hi kiyang tibêge vihati tô sea, om kiyang vihati ge, xe vông i la vac Kílisi kwa ngibi. <sup>6</sup>Xe viac xe di bin xam, ên xe nêb xam obêc la vac Kílisi kiyang vihati kwa ngibi ge od xe ob vông myaviwen vô he wê vô ninya kitu vô Kílisi kiyang ge.

<sup>7</sup>Xam xovô kiyang wê yêp vô xam mamnôn ge lê. Xomxo ti obêc xovô nêb i tu Kílisi xe pyap ge od i xovô bêga bê xe êno tu Kílisi xe tiyi xocbê i ge. <sup>8</sup>Apumtau vông xêkizêc vô xe ên nêb xe ngidu vông vinên wê xam vông ge xôn, di xe o vông xam vô nipaên lêm. Om a obêc kô xe lec ên yuac sinale wê xe vông ge od a nig ob yoc ên kiyang tige lêm. <sup>9</sup>Xam o léc xovô bêga bê a kivuu kipihac ge vô xam ên a nêb i vông xam yetac di xona lêm. <sup>10</sup>Ên xomxo ya nêl ên he nêbê, “Kipihac wê Pol mi kivuu vô xe ge, kivuu kiyang viyin hixôn xêkizêc, léc wê lam dô hixôn xe ge od dô i tiyi xocbê xomxo wê xêkizêc ma ge di i kiyang tiyi xocbê kiyang pileva.” <sup>11</sup>Om xomxo wê nêl kiyang tibêge ge, he i xovô bê buc wê a obêc miloc dô hixôn xam ge od a obêc vông i tiyi xocbê kiyang wê a kivuu vac kipihac vô xam ge.

<sup>12</sup>Xomxo wê yong he ge, xe ob nêl bê xe tiyi xocbê he ge lêm, di xe xona ên wê xe ob tixuu xe lec he ge. Ên heche va yaxên he ya xovôên wê he va vông ge, di he tixuu he lec heche va, om he tiyi xocbê xomxo piyôp maên. <sup>13</sup>Di xe ga, xe nêb xe ob yong xe i luu vêl lêm. Nge, xe ob yong xe lec yuac wê Anutu vông vac xe vigêm mi xe vông i tup vô di miloc vô xam ge. <sup>14</sup>Xe obêc miloc vô xam ilage lêm ge, od obêc tiyi xocbê xe kiyl yôg wê Anutu vông vô xe ge di yong xe vidaaên. Léc o bêge lêm, ên xe kô Kílisi xolac mi loc nêl vô xam taxlee. <sup>15</sup>Om xe o kiyl yôg di yong xe lec yuac wê xomxo ngwe vông ge lêm. Xe xo ên xe nêbê vông vinên wê xam vông ge i vô xêkizêc, ên yuac wê xe vông vac xam mahigun ge i vô levac di i loc tiyi yôg wê Anutu vông vô xe ge. <sup>16</sup>Ên obêc bêge ge od xe ob la nêl xolac vô tibii madiluhu wê dô nimi ge hixôn, di xe ob yong xe lec yuac wê xomxo ngwe vông ge lêm.

<sup>17</sup>Kiyang yêp bêga ên nêbê, “Xomxo ti obêc nêb pimil ge od i pimil Apumtau.” <sup>18</sup>Ên xomxo ti obêc pimil ici va ge od ob kô lê levac lêm. Léc Apumtau obêc pimil i ge od ob kô lê levac.

### Pol nêl sinale kityooên nên môt kitong

**11** <sup>1</sup>A xo ên a nêb a ob yong a tya tax, om xam vông a nêl. <sup>2</sup>A nêl bêge, ên a xêgyaa vin lec xam tiyi xocbê Anutu xêyaa vin lec xam nêb xam tu ixê, ên a nêl pyap ên a nêb xam ob ii vux ti. Vux tyo ge

Kilisi, om a ob vông xam vô i tiyi xocbê vêxwo nivihā ti. <sup>3</sup>Lêc a xona ên wê xomxo obêc kityoo xam tiyi xocbê myel nipaên kityoo Iv ya kiyang yacyac ilage, ên kiyang tibêge obêc vông xam piyôp vô nipaên di vông xam sea môp wê xam vông nilôm la diluhu vô Kilisi tixed ge. <sup>4</sup>Ên xomxo ya miloc vô xam di nêl kiyang lec Yesu, lêc o nêl i tiyi kiyang wê xe nêl vô xam ilage lêm. Di he nêb he ob vông Myakilôhô Ngibua vô xam, lêc o Myakilôhô Ngibua nôn wê xam kô ilage lêm. Di he nêl xolac ba ya vô xam wê o tiyi xocbê xolac wê xam vông i vin ilage lêm, lêcom xam ngô di vông i vin lutibed.

<sup>5</sup>Xam ngô lê. A xovô ên a nêbê xomxo wê xam yong he ên xam nêbê he sinale levac ge, he o luu a vêl lêm. <sup>6</sup>Mêd a nêl kiyang xocbê xomxo paha ti, lêc xovôên wê a vông ge o nipwo tya lêm. Nge, môp vihati wê a vông ge, a vông hixôn xovôên nivihā mi xam wê pyap.

<sup>7</sup>Buc wê a loc nêl xolac vô xam ge od a o kô mone ti lec yuac tige lêm, ên a nêb a ob vông xam lêm i vô levac, om môp tige vông a vô nipwo lec. Xam nêb a vông ge nipaênê? <sup>8</sup>Konglegesen ya vông mone lam vô a ên nêb ob ngidu a xôn di a vông yuac vac xam mahigun, om môp tige tiyi xocbê a vô he mone vêl ên a nêb i ngidu xam xôn. <sup>9</sup>Buc wê a dô hixôn xam di susu ya ma ên a ge od a o kitaa susu ti vô xam lêm. Ên il lige vông vinên ya kidi gê Masedonia di val vông susu wê ma ên a ge ya vô a. A viac a nivihā, om a ob viac a nivihā bêge di a ob vông viyin vô xam lêm. <sup>10</sup>Kiyang nôn wê Kilisi vông ge yêp vac a nilôg om a nêl hixôn nôn ên a nêbê a o kitaa susu ti vô xam lêm, di xomxo vac viğwe levac Glik vihati ge ti o tiyi wê ob le vac môp xôn ên kiyang tige lêm. <sup>11</sup>A nêl kiyang tige lec kehe vatya? Mêd a xêgyaa o vin lec xam lêm, me? Ma vêl, Anutu vaci xovô wê a xêgyaa vin lec xam ge.

<sup>12</sup>Xomxo ya nêb ob yong he di nêl bê he mi vông yuac tiyi xocbê xe mi vông ge. Om a ob le vac môp xôn ên he, di vông yuac i tiyi xocbê a vông ilage, di a ob kô susu ti vô xam lêm. <sup>13</sup>Xomxo tige, sinale kityooên, lêc he viyum he vac kiyang wê Kilisi nue sinale vông ge, di nêl kiyang kityooên vô xomxo. <sup>14</sup>Xam o lêc yetac ên môp tibêge lêm. Ên Seten vaci obêc viyum i vac kiyang nivihā tiyi xocbê angela xêseac vông ge, <sup>15</sup>om Seten nue yuac obêc viyum he vac môp nivihā wê Anutu nue yuac vông ge, om xam o lêc yetac ên môp tibêge lêm. Obêc timuên ge od xomxo tibêge ob kô myaviwen nipaên lec yuac wê he vông ge.

### Pol nêl viyin wê tulec i ge kitong

<sup>16</sup>A nêl gwêba di a ob nêl i tii vac vô xam bê xam o lêc xo bê a xomxo piyôp yacyac lêm. Lêc xam obêc xo bêge ge od pyap. Om xam ngô kiyang wê a ob nêl ga, ên a êno ob yong a nipwo tya. <sup>17</sup>Kiyang wê a ob nêl ga, Apumtau o nêl ên nêb a nêl tibêge lêm. Lêc a ob yong a tiyi xocbê xomxo piyôp yacyac ti. <sup>18</sup>Xomxo tibeac yong he lec môp kibun ga, om a êno, a



ob yong a lec môp tibêge hixôn. <sup>19</sup>Xam nêb xam piyôp levac lê, lêc xam mi ngô kiyang wê xomxo piyôp yacyac mi nêl ge. <sup>20</sup>Ên xomxo ya vông xam tu he nue yuac pileva di vun susu wê xam vông ge, di vông xam vô nipaên, mi pitap xam mamnôn di kô he lec vô xam, lêc xam o le vac he xôn lêm. <sup>21</sup>Xêkizêc wê xe vông ge ti o yêp tiyi wê xe ob vông môp bêge vô xam ge lêm. Lêc mêd xam so ên xam nêb xe nim ob yoc ên wê xe o vông môp bêge vô xam lêm ge?

A ob nêl kiyang i tiyi xocbê xomxo piyôp yacyac ge. Xomxo ti obêc yong i lec môp wê i vông ge od a êno tiyi wê a ob yong a lec môp wê a vông ge. <sup>22</sup>Xomxo ti obêc nêb i Hiblu ge od a êno, a Hiblu. Di ti obêc nêb i Islel ge od a êno a Islel. Di ti obêc nêb i kehe Eblaham ge od a êno kehe yêp vac Eblaham. <sup>23</sup>Di he obêc nêbê he Kilisi nue yuac ge od a êno Kilisi nu yuac. Lêc a obêc nêl kiyang i tiyi xomxo yacyac ti ge od a ob nêl bê a ga Kilisi nu yuac wê a luu he vêl ge. Ên a vông yuac levac ngînoo he vêl, di a la kalabuhu buc tibeac luu he vêl, di tibii hi a vô nipaên buc tibeac luu he vêl. Di buc tibeac, vô kwabo lec wê a ob xib. <sup>24</sup>He Yuda hi a ya let buc vigê vilu om he mi hi a lu 39 lec buc titi. <sup>25</sup>Di tibii hi a ya viyi lu yon, di buc ti xomxo nêx a ya ngidax, di sip vô nipaên lu yon di a la vac gwec, di lu ti gwec kô a mi vilee vô vidiiên ngwe di bucên ngwe. <sup>26</sup>Di a la môp dia tiyi buc tibeac, om susu wê vông a vô nipaên ge tibeac, xocbê mia butac, di tibii yôdac, di a lige Yuda hixôn tibii madiluhu ya nêb ob vông a vô nipaên, di a tulec viyin vac vigwe levac hixôn vigwe mahigun pileva di vac gwec, di buc ya, xomxo wê kityoo nêb he xomxo vông vinên ge nêb ob vông a vô nipaên. <sup>27</sup>Di a vông yuac levac om a nignivi vô myavinê sea, di a o xêp nivihia vô bucên lêm. Buc tibeac vip den a, lêc yaên hixôn mia ma ên a, di lea hi a ên a nêg ngakwi ma.

<sup>28</sup>Lêc o viyin tibêge vaci mô lêm. Ên buc vihati a xo konglegesen vihati ên a nêb a ob viac he nivihia, om kiyang tige vô viyin levac vô a. <sup>29</sup>Ên xomxo ti obêc vông i vin xêkizêc lêm ge od a êno ob dô i tiyi xocbê a o xêkizêc lêm. Di nipaên obêc pwoo xomxo ti pec ge od obêc vông a xêgyaa vô myavinê.

<sup>30</sup>A obêc yong a ge od a ob yong a lec môp wê nêl a kitong ên nêbê a o xêkizêc lêm. <sup>31</sup>Il lig Apumtau Yesu ma Anutu xovô pyap ên nêbê kiyang wê a nêl ga, a o kityoo lêm. Il ob pimil Anutu lê i vô levac di i yêp luta lêc luta.

<sup>32</sup>Buc wê a dô vigwe Damaskas ge, hizap levac wê King Aletas vông ge, vông nue la viac môp Damaskas nêb ob hôm a xôn, <sup>33</sup>lêc lige ya tung a vac sepac nilô di vông a lop vac vuayen nipwo wê le vac xenac levac ge di a lop mi la xenac kehe di pec mi la ên hizap levac vigê.

### Pol nêl vivia wê yê ge kitong

**12** <sup>1</sup>A obêc yong a ge od ob vô nivihia vô a lêm, lêc xomxo ya ge, he yong he vô xam, om a êno ob yong a lec vivia hixôn kiyang wê

Apumtau hilung vô a ge. <sup>2</sup>Xomxo wê vông i vin Kilisi ge ti dô, lêc Anutu kô i mi la lag puunê ti wê vông yon ge. Ge ilatikwê di klismas vigê yuu di tô mi la yuudiyuu la vêl. Xomxo tige ninivi la, me ninivi dô di kinu vaci la, ge a lungên. Anutu vaci yê. <sup>3</sup>A xovô ên a nêbê xomxo tige, Anutu kô i mi la lag puunê. Ninivi mêd la hixôn me kinu vaci la, ge a lungên, di Anutu tived xovô. <sup>4</sup>Gê lag puunê xomxo tige ngô kiyang ya, lêc o tiyi wê ob nêl kiyang tige kitong lêm, ên kiyang tige Anutu nêl xôn nêb nêl kitongên i ma. <sup>5</sup>A tiyi wê a ob yong xomxo tige, lêc a ob yong aca va lêm. A obêc nêb yong a ge od a ob nêl bêga bê a o xomxo xêkizêc lêm, di a ob yong a lec tige tived. <sup>6</sup>Vixôhilôg, a obêc nêb yong a ge od a ob nêl kiyang i tiyi xocbê xomxo yacyac mi nêl ge lêm. Nge, kiyang wê a ob nêl ge, a ob nêl kiyang nôn. Lêc a ob yong a tibêge lêm, ên a nêb xomxo ti i o lêc ngô kiyang wê a ob kô a lec ge di nêl bê a xomxo nivihâ lêm. Nge, a nêb xomxo i yê môp wê a mi vông ge di ngô kiyang wê a mi nêl ge di xovô a.

### Pol ninivi tulec myavinê

<sup>7</sup>Vivia wê Anutu hilung vô a ge, nivihâ yang, lêc Anutu nêl ên nêb a o lêc yong a lec vivia tige lêm, om vông myavinê ti vô a xocbê yin vac a nignivi. Myavinê tige tiyi xocbê Seten nu yuac ti lam hi a, ên Anutu nêb a o lêc kô a lec lêm. <sup>8</sup>Om a kitaa vô Apumtau lu yon, ên a nêb i vông myavinê tige i tip loc vêl ên a, <sup>9</sup>lêc Apumtau nêl vô a ên nêbê, “A ob vô vêl lêm, ên xêyaa vin lecên wê a vông ge tiyi ông pyap, di xêkizêc wê a vông ge ob vô levac vô xomxo xêlehelehe.” Apumtau nêl bêge vô a, om a ob dô hixôn xêgyaa nivihâ di hi vixag i pec ên wê a nêg xêkizêc ma ge, ên xêkizêc wê Kilisi vông ge i hivun a xôn. <sup>10</sup>Om a nêg xêkizêc obêc ma di xomxo obêc nêl kiyang nipaên vô a, di a obêc tulec viyin ya, di xomxo obêc nêb vông a vô nipaên, di a obêc kilê viyin viyang viyang lec Kilisi lê ge od a xêgyaa ob vô nivihâ, ên buc wê a dô xêlehelehe ge od Kilisi ngidu a xôn di a dô xêkizêc.

### Pol nêb ob ngidu vông vinên wê he Kolin vông ge xôn

<sup>11</sup>Kiyang wê a nêl ga, a nêl i tiyi xocbê xomxo yacyac ge, lêc xam vông a nêl kiyang tibêge, ên xam obêc pimil a ge od nivihâ, lêc xam vôngên ma om aca va kô a lec vô xam. Vixôhilôg, a xomxo pileva ti, lêc sinale levac levac o luu a vêl lêm. <sup>12</sup>A dô hixôn xam di kilê viyin hixôn xêgyaa nivihâ, di a vông do levac wê ob nêl sinale kitong ge, om a vông do levac viyang viyang ya xêkizêc wê Anutu vông ge. <sup>13</sup>Om môp tina wê a la vông vac konglegesen ya di a o vông vac xam mahigun lêmê? Môp tived wê a o vông vac xam mahigun lêm ge bêga nêbê a o kô susu ti vô xam pileva lêm. Om xam kitya a nêg nipaên tige vêl!

<sup>14</sup>A viac a pyap om a ob lôc vô xam lu ti hixôn wê ob vông lu yon ge, di a ob kitaa susu ti vô xam lêm. Ên a nêb a ob kô susu wê xam vông ge

lêm. Nge, a nêb a ob viac xam i tiyi xocbê mae viac nue ge. Ên nue nipwo ob kituc susu ên i ngidu tae mae xôn lêm. Nge, tae mae, he ob kituc susu di ngidu nue xôn. <sup>15</sup>Om a obêc vông aca va hixôn susu vihati ên i ngidu xam xôn ge od a ob vông hixôn xêgyaa nivihia. A xêgyaa vin lec xam luu vêl, lêc mêd xam xêmyaa o vin lec a nipwo tya lêmê?

<sup>16</sup>Xam ya nêl ên xam nêbê, “Vixôhilôg, Pol o kô susu wê xe vông ge ti vô xe mamnôn lêm, lêc Pol ge xomxo kityooên om mêd kityoo xe di vô xe susu ya vêl.” <sup>17</sup>Xam wê lê. Xomxo wê a vông i loc vô xam ge, mêd a vông he ya loc kityoo xam di vô xam susu ya vêl, me? <sup>18</sup>A vông Taitas hixôn li ngwe, yuu loc vô xam, om mêd Taitas kityoo xam di vô susu ya vêl ên xam, me? Myakilôhông Ngibua wê dô hixôn xii Taitas ge, mêd o tived lêmê? Mêd xii xôn o timu vô môp tived lêmê?

<sup>19</sup>Xam mêd xo ên xam nêbê xe kivuu kiyang ga ên xe nêb xe ob titô kiyang wê xe vông ge di yong xe vô xam mamnôn. Lêc o bêge lêm. Ên xe tu Kîlisi nue yuac om xe nêl kiyang tige vô Anutu manôn. Xam lige, kiyang ga vihati xe kivuu ên xe nêb xe ob ngidu vông vinên wê xam vông ge xôn. <sup>20</sup>Ên a xona ên a nêbê buc wê a obêc loc vô xam ge, mêd a ob miloc xê wê xam o tup vô môp wê a xovô ge lêm, di kiyang wê a ob nêl vô xam ge, a ob nêl tiyi xocbê kiyang wê xam nêb a nêl vô xam ge lêm. A xona ên a nêb a obêc xê wê xam kunacma di wêma nipaên, di xêmyaa vô myavinê vôma, di xam vông vevac vôma, di xam nêl kiyang nipaên lecma, di nêl kiyang nimi, di kô xam lec, di vông môp vaxvax. <sup>21</sup>A xona ên buc wê a obêc miloc vô xam tii vac ge, ên a Anutu mêd obêc vông a nig yoc ên nipaên wê xam vông ge, di a nilôg obêc vô viyin levac ên wê lime tibeac o pilepac he di sea môp nipaên wê he vông ge lêm. Môp nipaên bêga nêbê môp ningeac di môp yôdac vêx yuu vux, di môp vaxvax.

### Pol nêl vô he Kolin ên nêb he i viac he i nivihia

**13** <sup>1</sup>Gwêbaga a ob loc vô xam lu ti hixôn wê ob vông lu yon ge. Xomxo yuu me yon obêc nêl kiyang ti timu vôma vixa lec xomxo ti nêl nipaên ge od il ob yaxên kiyang tige. <sup>2</sup>Ilage a loc dô hixôn xam lu yuu di a nêl vô he wê vông môp nipaên ge hixôn xam baba ên a nêb a obêc vông myaviwen vô xam. Di gwêbaga a dô teva ên xam, lêc a ob nêl i tii vac vô xam bê a obêc milôc vô xam ge od a ob xo vîgwe pisiv ên he wê vông môp nipaên ge lêm. <sup>3</sup>Xacxam va nêb xam ob xovô bê Kîlisi nêl kiyang vac a myag, me? Om xam obêc xovô lec môp wê a vông ge. Ên Kîlisi o tiyi xocbê xomxo xêhehehe ge lêm. Nge, vông yuac hixôn xêkizêc vac xam mahigun. <sup>4</sup>Vixôhilôg, he hi Yesu yib lec xax pola tiyi xocbê xomxo wê xêkizêc ma ge, lêc gwêbaga Yesu dô maviha ya xêkizêc wê Anutu vông ge. Di xe êno, xe timu vô Kîlisi vixa om xe dô tiyi xocbê xomxo xêhehehe ge, lêc xêkizêc wê Anutu vông ge vông xe dô mamviha hixôn Kîlisi om xe hilung xêkizêc tige vô xam.

<sup>5</sup>Xam toto yaxên nilôm di xovô bê xam vông i vin Kîlisi nôn, me xam o vông i vin lêm. Xacxam va dô di yaxên. Yesu Kîlisi dô vac xam nilôm, léc mêd xam o xovô lêm? Xam obêc yaxên bê xam o vông i vin lêm ge od xam o tu Kîlisi nue nôn lêm. <sup>6</sup>Di a xovô ên a nêbê xam obêc yaxên xe ge od xam ob xovô bê xe vông i vin nôn. <sup>7</sup>Xe kitaa vô Anutu ên xe nêb i ngidu xam xôn di xam sea môp nipaên vihati. Xe o nêl ên xe nêbê xomxo i yê môp wê xam vông ge di pimil xe lec yuac wê xe vông vac xam mahigun ge lêm. Nge, xe nêb xam vông môp wê nivihâ ge, di xomxo obêc yaxên xe léc nêb yuac wê xe vông ge tiyiên ma ge od pyap. <sup>8</sup>Léc xe o tiyi wê xe ob vông kiyang nôn i vô nipaên ge lêm. Nge, xe ob ngidu kiyang nôn xôn. <sup>9</sup>Om xe nêb xêkizêc obêc ma di xam obêc le xêkizêc ge od ob vông xe xêmyaa vô nivihâ. Om xe kitaa vô Anutu tiyi buc vihati ên xe nêb vông vinên wê xam vông ge i léc xêkizêc. <sup>10</sup>Gwêbaga a dô teva di kivuu kipihac tiga vô xam, ên a nêb xam pilepac xam di buc wê a ob mîloc vô xam ge od a ob nêl kiyang myagpilihi vô xam lêm. Ên Apumtau vông xêkizêc vô a ên nêb a ngidu vông vinên wê xam vông ge xôn, di o vông xêkizêc vô a ên nêb a vông xam vô nipaên lêm.

### Kiyang myahipu ya

<sup>11</sup>Xam lige, a ob nêl kiyang myahipu timuên bêga bê xam titô xam kiyang i yêp nivihâ, di xam ngô kiyang wê a nêl ga, di xam nilôm i yêp tibed, di xam dô vac kiyang malehe nilô. Xam obêc vông bêge ge od Anutu wê xêyaa vin lecên di kiyang malehe kehe ge ob dô hixôn xam.

<sup>12</sup>Xam pulma vigêm ên i nêl kitong bê xam xêmyaa vin lecma. Lime vông vinên vihati ga nêl vidiiên vô xam.

<sup>13</sup>Apumtau Yesu Kîlisi i vông vizid nivihâ vô xam, di xêyaa vin lecên wê Anutu vông ge i viac xam, di Myakilôhô Ngibua i titup xam xôn di hivun xam vihati xôn.